




T3041/2281



CHINESE - JAPANESE LIBRARY OF
HARVARD - YENCHING INSTITUTE
AT HARVARD UNIVERSITY
JAN 10 1941





游名山記序

天下之文繁矣必精擇而後行猶名山焉先知其夷險乃可登也履夷避險而不遺曲折其見道之明者乎升高自卑而不由旁徑其遵路之正者乎尋繹光景萬象呈新觴詠真率威儀惟謹斯善遊者矣惟學亦然故曰致廣大而盡精微極高明而道中庸溫故而知新敦厚以崇禮未有尊德性而遺道問學者也朱子曰沉酣文藝反蔽良心陸子曰束書不觀浮談無根數言

盡之矣苟談心學而求諸空寂屏絕書籍謂無
與於我是猶欲游名山而無稽則亦曠於途也
已然則讀書其合內外者與嗟乎博文而約之
以禮多識而貫之以一吾所以直指洙泗之真
傳斷斷乎其不可易也昔歲甲申忝從太史之
役道吳門獲交南濠都公穆與之上下其論博
洽古今非吾所及也時公以太僕少卿致政家
食貌古情孚心甚服之晤間乃出所著游名山
記見示敘事曲暢彙物分明凡觀覽雖一夷一

險莫不鋪叙詳密如在目前時時覽之神會天
游得以養吾仁知之性雖不出戶而心之所樂
者廣且大矣惜其所記乃足跡所及猶多所遺
也今括蒼賓巖何公廣採旁羅凡史志文集所
載者輯萃無遺爲書幾二十卷而都氏平生見
聞所未及者畢在吾得縱觀之所樂之廣且大
眎昔無慮百倍真可爲博學多識之助足以播
諸天下摛之無窮云夫名山大川起於崑崙漢
桑欽水經蓋托始焉嘗考河崑之文天一地六

在北者蓋天氣行乎地中先天之坤後天之坎也洛書之文陽止陰上位乎西北蓋山下出泉黃河自中國流入于海先天之艮後天之乾也茲編首載

京師諸名山踈乾苞坤乃徧及天下其亦托始崑崙之義與公名其字某嘉靖丁未以毛詩大魁多士當簡入中祕爲詞林宗而才大數竒遇躡復起以尚書刑部郎出守吾廣潮郡適逢寇變督府元戎統大軍分五道駐潮諸司往謁無

虛日籌畫策應羽檄旁午然公處之裕如積倉累糧兵食饒足旦夕方與嘉賓名士載酒游韓山如無事時且刻韓文而誦諷之上下皆服其德量則其學術豈顯外而遺內者邪比巨寇悉殲轅門奏捷功冠彛常當有殊錫而素以學行馳名海內遂擢學憲江西特常調爾其往也授簡俾序茲記顧惟菲陋曷敢當諸夫江西文獻大邦也士林彬彬自宋以迄于今皆宗內外合一之道其風醇矣盛矣佐學荒言毫無能闡明

姑撫拾舊聞漫書以歸之

嘉靖四十二年歲次癸亥季秋吉日

賜進士出身中順大夫詹事府少詹事兼翰林院侍讀學士前南京國子祭酒 經筵講官同修

國史

玉牒泰泉黃佐撰

游名山記序

夫嘉族衆美流藉曠遠使愉快其情不自我已
是之謂大通錫類平施敷德之究而政之推予
它爭辦文具亡實者異路趨矣大素闡繹以范
其有上而星辰爲天之文下而山川爲地之理
中而聰明聖智爲人之極眇晰混淪三才攸植
天不可階繇故而測其度煎無所遺五嶽四瀆
泊諸龐鴻截業之基瓌詭絕麗之致異壤不虛
產方州不襲見譬名世者介乎麟鳳之間所以

性諛賞陟結攬竒秀者滔滔而是而闕且闕者亦居多焉孔子登東山而小魯登泰山而小天
下孟子觀瀾之術浩乎出山海之外豈易訾哉
太史公南游江淮上會稽探禹穴窺九疑北涉
汶泗齊魯之郊此其列也而或卧游以愜其悰
不親而賦以博其趣若今喬白巖都玄敬諸公
靡適不游靡游不述其自謂轢兪兒之幽都犯
天吳之雄濤然足跡所不躡酷亦懸心焉程明
道慕泰華之勝在鄆縣不迄造如恐失之及登

第請註簿鄆用畢其志已自竭叙以章示同好
若人非外轉者而情耆之鍾猶若是豈不以巖
岫殊尤固神物之所陶楠柰何其闕於屣步閱
賞適猶乾度之必測而莫以玩耳目爲解也乎
賓巖何公以爲名山觸地而具而身歷者十九
風雨情變之所羈阻不卒揭榼躡屩之興幸一
惠於攀踐滋多川陸鬲逖靈秀罔竟非惟目所
不給亦且聞所不逮河清難俟鑿空非恒而希
心崑閩麟洲安在是以逸人勝士每毒玄遙之

想乃爲之旁求經游者之作彙星歲而稍備庶
幾不越戶庭坐挹萬里拘之乎尺籍而包賅無
外援授梓人使雅尚者得之披覽亟窮寓內之
竒崛我所愉快旬歲之勞而通百世之大觀儀
不效蔡中郎私護自媚也公自州郡以當今任
莫不推心所欲以引濟人其委鬱捍抗咸援而
登諸通達衽席之上有嘒吾施者寧不利其身
毋寧利澤之違於人他日輔翼繇是也茲所推
愉快以及物者其猶一快耶廬陵吳炳用晦撰

游名山記序

友人觀察使何君振卿曠朗宏博縱心世外
而尤邃於仁智之樂自其為諸生偕計吏敷
歷中外足跡幾天下半而君之所謂樂者不
衰君凡遇佳山水必游遊必有詠歌叙述之
類而尤未噍于志一日喟然曰嚴夫子有言
州有九游其八夫以天下之名能游者而不
能無恨於其一之所未至而况於余所游者
僅半也余且倦而必欲以余之年而盡余足

以余之足而盡余目亦難矣則又曰庶幾有
少文之技以丹青余壁而又幼輿我於丘壑
乎哉然余室之為壁者幾而天下之為名山
水者寧啻十百千萬也夫壁之不足以盡天
下山水與余足之不足以盡余目均也既而
豁然曰得之矣乃構古今名雋之紀游者自
大都而留京而五嶽極而羅施鬼方之域若
而山其水附之自漢應劭而唐柳宗元而至
于今若而人自漢官儀而記而詩序而題壁

者若而篇其有文而不獲全者事而不獲專
者標韻最勝臚列而品分之曰勝紀曰名言
曰類考為卷僅十七其文已五十萬餘言自
君之成此書則日夕侍其尊大夫公雖亟薦
亟起不復肯出為世用時展卷而一讀其昔
所游者儼乎其若歸又若與其故人晤而其
所未游者悅乎其若身之歷而目之遇也然
自是探竒慕異之士踵相尋於君闕以問所
謂記者君不勝其繁則梓而應之以廣其好

而屬序於余余固嘗仕宦躑躅於燕齊晉楚
吳越間然其跡尚不能當君之半自岱宗太
行匡廬參嶺兩洞庭張公善權桐廬外其勝
不能得君之十三雖謬稱同君好然不能盡
廢有司之轍而與樵夫漁叟窮其造獨所蓄
數十編雖不能盡如君間或有出於君之表
者因悉舉而歸之而叙其所以嗟夫讀君之
書而可以無事游矣得其所謂穹如者奧如
者淵如者以與心謀而可以無事書矣山河
大地一切而空之所謂穹如奧如淵如者亦
陳跡而君之書亦可以無事吾贅矣姑以復
何君君其首肯余否吳郡王世貞撰

游名山記序

蓋幅員之內名山若碁布然而好游者不能什
二居也慕金紫者以雲霞爲贅疣耽茅社者以
巖壑爲尸塚甘五鼎者以芝朮爲糠粃悅浮榮
者以逸民爲槁壤湛案牘者以躋探爲怠事而
或山氓谷叟樵豎漁人之流仰憎青巒俯厭洞
府鳴澗反以曠耳層崖頽以耗目又安知白雲
可以自悅泌水足以樂饑乎哉若乃躡屩窮攀
之士采真獨往之夫冥心泉石而畢志雲蘿者

非不膏肓空谷寤寐在阿矣然興寄而每以形
牽神邁而動以迹累嚴君歎意於九州尚長嬰
情於婚嫁時與事偕物與我并蓋自古難之矣
余自結髮之歲雅好游觀北涉燕趙南登會稽
舟車所歷萬里而半停鸞駐馬瞻賞徘徊非不
眷戀名丘談討松桂爾已顧栖遲俗鞅骯髒名
場姓未脫於公車籍尚沿乎計吏緇塵在袖素
絲被領使黃鵠咲乎壤虫大鵬陋夫尺鷃且也
茂陵消渴具乏濟勝菜蕪生魚貲竭羸糧待禽

生而不來命惠子兮未至此猿鶴所以怨咨林
嵐爲之躑躅者也括蒼何先生振卿淵岱奇琛
人倫冠冕迴馭畏途抗情霞外身絳纓紱而性
稟清真足蹈朱門而思凌遐曠蒐羅採摭輯爲
此編大述五山小迨培塿之丘近標 皇甸遠
踰窮髮之域靈區異境罔不登載鴻藻片撰靡
有漏遺卷僅一十有七言盈七十餘萬俾尋岳
者不必於佩圖采真者奚煩於問徑間關甌越
寄我闔閭不鄙椎文屬序首簡使夫庭樹生色

床琴自鳴貯飛瀑於屏風染翠微於楣棟少文
之室宛列衆山幼輿之顛置在丘壑矣嗟乎伐
木開道禍於游也圍棋蠟屐名於游也華山慟
哭險於游也天台不返僊於游也是皆行違高
逸蕩荒凶恠中庸之道有所未取若夫九州之
內可以卧游九州之外可以神游推而至於冥
漠之濱無何之域蒼蚪之轅所未歷赤鱗之驟
所莫徧非夫天游之至人飈御之真侶惡能出
入鴻濛蟬蛻埃壒之表乎異時得御元禮執鞭

晏嬰請從先生而前席可與太原王稗登序

游名山記

古今游名山記目錄

凡例

總錄

勝紀

名言

類考

卷之一

西苑

北京諸山泉附

卷之二

金陵

南京諸山泉附

卷之三

琅琊山

江北諸山泉附

卷之四

齊雲山

江南諸山泉附

卷之五

東嶽泰山 山東諸山泉附

卷之六

中嶽嵩高山 河南諸山泉附

卷之七

西嶽華山 陝西諸山泉附

卷之八

北嶽恒山 山西諸山泉附

卷之九

南嶽衡山 湖廣諸山泉附

卷之十上

鴈蕩山 兩浙諸山泉附

卷之十下

雪竇山 浙江諸山泉附

卷之十一上

匡廬山 江西諸山泉附

卷之十一下

武功山 江西諸山泉附

卷之十二

武夷山 福建諸山泉附

卷之十三

羅浮山 廣東諸山泉附

卷之十四

隱山 廣西諸山洞附

卷之十五

峩眉山 四川諸山泉附

卷之十六

點蒼山 雲南諸山泉附

卷之十七

天然洞 貴州諸山泉附

古今游名山記目錄終

古今游名山記總錄

凡例五條

一勝紀名言稽條古今游者而逸人之致靜者之辭其離放囂侈而深賞適者皆錄焉雖不盡屬於游而游不通其趣卽勤於登陟亦徒役耳目而無當也

一類考簡其標表山川予夫洞天福地籍置玄經者其發物滋著英靈窟宅軌道夷易非十洲不據之質固方內游士之所取大也

一山記次列古今游而能言者暢布于篇卽巖壑奇詭燭入丹青情致彼我得之不遠伐柯之則一展誦若親披歷從之陟降山原其浮敘量存刪節亦類書之體非故肆心而矯奪之成言也賦則一二收之惟詩興寄多方牽喻靡壹以俟它撰

一諸游記作者惟著世代爵里以存考訂不詳其餘也

一載首二京次各省遵制也其近章得索究之便而遐僻者難致故有繁簡之異若貴州則希乎不登略檢所知以備一方尚有冀于博覽

者

古今游名山總錄

勝紀

黃帝將見大隗於具茨之山方明為馭昌寓驂乘於襄城之野七聖皆迷適遇牧馬童子問途焉莊子

黃帝遊乎赤水之上登於崑崙之丘莊子

黃帝披山通道東至于海登丸山及岱宗西至于崆峒登雞頭南至于

江登熊湘北逐葷粥合符釜山而邑于涿鹿之阿外紀

歲二月東巡狩至于岱宗五月南巡狩至于南岳八月西巡狩至于西

岳十一月北巡狩至于北岳尚書

天子遂襲崑崙之丘遊軒轅之宮眺望鐘山之嶺玩帝者之寶勒石王母之山紀迹玄圃之上乃取其嘉禾艷草奇鳥怪獸玉石琿瑰之器重

膏銀燭之寶穆天子傳

括蒼何鏞振卿甫編輯
廬陵吳炳用晦甫校正

圖書館珍藏印

周穆王少好神仙常欲使車轍馬跡徧於天下以倣黃帝焉八駿之馬
奔戎爲右造父爲御又觴西王母於瑤池之上王母謠曰白雲在天道
里悠遠山川問之將子無死尚能復來 太平廣記

秦始皇至雲夢望祀虞舜於九疑浮江下觀丹陽至錢唐臨浙江上會
稽祭大禹望於南海傍海北至琅邪 史記

東游登之罘刻石其辭曰維二十九年時在中春陽和方起皇帝東游
巡登之罘臨照于海從臣嘉觀原念休烈追誦本始祇頌聖烈請刻之

衆史記

武帝行幸雍遂北出蕭關歷獨鹿鳴澤自代而還 行幸至甘泉宮賓

禮外國客又行幸東海獲赤鴈 又南巡至盛唐祀虞帝于九疑登天

柱山自尋陽浮江斬蛟江中遂北至琅邪傍海而還所過名山大川

冬巡狩望祀虞舜于九疑登瀟天柱山自尋陽浮江親射蛟江中獲之

舳艫千里 漢書

上將祭后土乃帥羣臣橫大河凌汾陰既祭行游介山回長安顧龍門

覽鹽池陟西岳以望八荒迹殷周之虛眇然以思唐虞之風 楊雄傳

上既封泰山之後三十年間車轍馬跡至于太原遷于長安時或謁太

廟祭南郊每歲孟春巡幸甘泉而已聖王以爲王者之體告厥成功止

於岱宗可矣故不肯到崆峒訪具茨驅八駿於崑崙親射蛟於江水始

爲天子之能事壯觀焉爾 杜甫封西嶽賦序

周靈王太子晉好吹笙作鳳鳴游伊洛間道士浮丘公接上嵩山三十

餘年往來緱氏山其後告桓良曰告我家七月七日待我緱氏山頭果

乘白鶴往山頭望之不得到舉手謝時人而去 列仙傳

伯夷叔齊隱于首陽山采薇而食之歌曰登彼西山兮采其薇矣以暴

易暴兮不知其非矣神農虞夏忽焉沒兮我安適歸矣 史記

齊景公遊于牛山而北望齊曰美哉國乎鬱鬱綦綦 韓詩外傳

晉平公遊西河中流而歎曰嗟乎安得賢士與共此樂乎 新序

昔楚王登疆臺而望崇山左江右湖以臨方渥其樂忘死 戰國策

楚昭王欲之荆臺遊司馬子綦進諫曰荆臺之遊左洞庭之波右彭蠡

之水南聖獵山下臨方准其樂使人遺老而忘死 說苑

南越宮在長樂里東到春申君府秋冬治城中春夏治姑胥之臺旦食於紐山晝游於胥母射於軀陂馳於游臺興樂 越絕書

武侯浮西河而下中流顧謂吳起曰美哉山河之固此魏國之寶也起

對曰在德不在險昔三苗氏左洞庭右彭蠡德義不脩禹滅之夏桀之

居左河濟右泰華伊闕在其南羊腸在其北脩政不仁湯放之殷紂之

國左孟門右太行常山在其北大河經其南脩政不德武王殺之由此

觀之在德不在險若君不脩德舟中之人盡為敵國也武侯曰善 通鑑

莊子與惠子遊濠梁之上莊子曰儵魚出遊從容是魚樂也惠子曰子

非魚焉知魚之樂也莊子曰子非我焉知吾不知魚樂也 莊子

暮春者春服既成冠者五六人童子六七十人浴乎沂風乎舞雩詠而歸

夫子喟然嘆曰與點也 論語

陸通楚王遣使者聘通妻從市來曰先生少而為義豈老違之哉門外

車跡何深也於是夫負釜甑妻戴紕器游諸名山食桂櫨實黃菁子隱

蜀峨眉山高上傳

盧遨遊玄關在北海至蒙轂之土見一士深目而玄準渠頭而為肩軒

軒然迎風而舞顧見遨慢然而下其臂遁乎卑下遨往視之方卷龜殼

而食蛤蜊遨曰遨少好遊背羣離黨觀於六合之外夫子可與遨為友

矣若士傲然笑曰我方南游乎罔畏之野北息乎沉默之鄉西窮冥冥

之里東貫鴻濛之光其外猶有沉沉之泥下無地上無天吾能往來子

處矣吾與汗漫遊於九垓之上乃舉臂聳身入雲中遨仰視曰吾比夫

子猶黃鵠與壤虫也終日行不離咫尺而自以為遠不亦悲哉遨燕人

秦始皇召為博士使求仙 出淮南子

李少君齊國臨淄人也少好道入泰山採藥遇安期先生求隨奉給奴

役便聽師事之安期將少君東至赤城南之羅浮北至太恒西游玉門

周流五嶽觀看山川如此數十年 漢書

余嘗西至空峒北過涿鹿東漸於海南浮江淮矣至長老皆各往往稱

黃帝堯舜之處風教固殊焉 史記

太史公有子曰遷遷生龍門耕牧河山之陽年十歲則誦古文二十而南遊江淮上會稽探禹穴闕九疑浮於沅湘北涉汶泗講業齊魯之都觀孔子之遺風鄉射鄒嶧厄困鄙薛彭城過梁楚以歸史記

漢明帝時劉晨阮肇入天台山采藥失道食盡見桃實食之覺身輕行數里至溪澗持盃取水見一杯流出有胡麻飯溪邊二女子笑曰劉阮二郎捉向所失杯來便迎歸作食既出無復相識至家子孫已十世矣

漢匡俗字子希少以孝弟著委心學道遊諸名山至覆笥山山頂有湖周數里多靈草異物有石鴈春秋時能羣飛湖旁有石井及小石筍筍藏玉牒記名山福地及得道人姓名真仙通鑑

陳湯為人沉勇有大慮多策謀喜奇功每遇山川常登墾漢書

梁竦自負其才鬱鬱不得意登山遠望嘆息曰大丈夫生當封侯死當廟食如不然閑居足以養志詩書足以自娛州郡之職徒勞人耳本傳向長字子平讀易至損益卦喟然嘆曰吾已知富不如貧貴不如賤但未知死何如生耳男女娶嫁既畢勅斷家事勿相關肆意與同好北海

禽慶俱遊五嶽名山竟不知所終高士傳

梁鴻與妻共入霸陵山中以耕織為業詠讀詩書彈琴自娛因東出關過京師作五噫之歌有頃居齊魯之間又去適吳居臯伯通廡下友人京兆高恢隱於華陰山中鴻東遊思恢作詩曰鳥嚶嚶兮友之期念高子兮僕懷思想念恢兮爰集茲高士傳

韓康字伯休京兆霸陵人也常遊名山采藥賣於長安市中口不二價者三十餘年高士傳

王烈嘗入太行山聞雷聲往視之見山石上破數百丈石中有一孔尺餘中有青泥流出烈取搏之隨手堅凝氣味如粳米高士傳

王烈入河東抱犢山得一石室室中有兩卷素書烈讀不知其字不敢取頗諳十數字形體歸書之以示稽叔夜叔夜盡知其字烈乃將叔夜往識其徑分明了了往至失石室所在烈竊語弟子曰叔夜不應得道故也本傳

許邁句容人擇餘杭懸雷山結廬居焉往來茅嶺間放絕世務以尋仙

館惟朔墜一歸定省而已及親終遂棄家徧游名山莫測所終高士傳

嵩高山北有大穴莫測其深百姓歲時每遊觀其上晉初嘗有一人誤墜穴中同輩冀儻不死投食於穴中墜者得之為尋穴而行計可十許

日忽曠然見明又草屋中有二人對坐圍棋局下有一杯白飲墜者告以饑渴甚者曰可飲此墜者飲之氣力十倍半年許乃出自蜀中歸洛

下問張華華曰此僊館所飲者玉漿也所食者龍穴石髓也劉義慶世說

許真人少學道於王屋山周游名山洞府嘗至武夷絕頂險處題云許

借自我山尋偃月子到此武夷山志

邳詵數月山行喜聞樵語牧唱曰洗盡五年塵土腸胃欣然倚驂臨水

久之而去本傳

謝太傅盤桓東山時與孫興公諸人汎海風起浪湧諸人竝懼太傅吟

嘯自若舟人以公貌閑意悅猶去不止既風轉急公徐云如此將安歸

衆即承響而回晉書

謝安寓居會稽與王羲之及許詢桑門支遁游處出則漁弋山水入則

言詠屬文無處世意常往臨安山中坐石室臨濬谷悠然嘆曰此亦去

伯夷何遠晉書

道壹道人從都下還東山經吳中已而會雪下人問在道所經壹公曰

風霜固所不論乃先集其慘淡郊邑正自飄瞥林岫便自皓然世說

謝車騎道謝公遊肆復無乃高唱但恭坐捻鼻顧睐便自有寢處山澤

間儀世說

阮步兵嘯聞數百步蘇門山中忽有真人幾代者咸共傳說阮往觀見

其擁膝巖間籍登嶺就之箕踞相對阮商略終古上陳黃農玄寂之道

下考三代盛德之美以問之佻然不應復敘有為之外棲神導氣之術

以觀之彼猶如前凝矚不轉籍因對之長嘯良久乃笑曰可更作籍復

嘯意盡退還半嶺許聞上啣然有聲如數部鼓吹林谷傳響顧看乃向

人嘯也晉書

嵇康遊於汲郡山中遇道士孫登遂與之遊康臨去登曰君才則高矣

保身之道不足晉書

五

清利

孔車騎少有嘉遁意未仕宦時嘗獨寢歌自箴誨自稱孔郎遊散山石
百姓謂有道術爲生立廟世說

康僧淵在豫章去郭數十里立精舍傍連嶺帶長川芳林列於軒庭清

流激於堂宇乃閑居研講希心理味庾公諸人多往看之觀其運用吐

納風流轉佳處之怡然亦有以自得本傳

許椽好遊山水而體便登陟時人云許非徒有勝情而實有濟勝之具

世說

顧長康畫謝幼輿在巖石裏人問其所以顧曰謝云一丘一壑自謂過

之此子宜置丘壑中世說

陳留阮籍譙國嵇康河內山濤三人年皆相比康年少亞之預此契者

沛國劉伶陳留阮咸河內向秀瑯邪王戎七人常集于竹林之下肆意

酣暢故世謂竹林七賢世說

稽阮山劉在竹林酣飲王戎後往步兵曰俗物已復來敗人意王笑曰

卿輩意亦復可敗耶世說

羊祜與從事鄒潤甫登峴軸泣曰自有宇宙便有此山由來賢達勝士

登此袁士者多皆湮滅無聞潤甫對曰明公德冠四海道嗣前哲今問

今聖堂與此山俱傳晉書

阮籍登廣武戰場曰時無英雄使豎子成名世說

王長史登茅山大慟哭曰卿邪王伯輿終當爲情死世說

王濬冲爲尚書令著公服乘輅車經黃公酒壚顧謂後車客曰吾昔與

稽叔夜阮嗣宗共酣飲於此壚竹林之遊亦預其末自嵇生夭阮公亡

以來便爲時所羈繼今日視此雖近邈若山河世說

王恭始與王建武忱甚有情嘗行散至京口射堂于時清露晨流新桐

初引恭目之云王大故自濯濯世說

孫興公爲庾公參軍共遊白石山衛君長永在坐曰此子神情都不關

山水而能作文庾曰衛風韻雖不及卿諸人傾倒處亦不易世說

庾太尉在武昌秋夜氣佳景清佐吏殷浩王胡之之徒登南樓理詠音

調始適聞笛道中有履聲甚厲定是庾公俄而率左右十許人步來諸

賢欲起避之公徐云諸君少住老子於此處興復不淺因便據胡牀與諸人詠謔後王逸少與王丞相言及此事丞相曰元規爾時風範不得不小顏右軍曰唯丘壑猶存世說

謝中郎萬經曲阿後湖問左右此是何水答曰曲阿湖謝曰故當淵注停著納而不流世說

荀中郎羨在京口登北固望海云雖未覩三山便自使人有凌雲氣若秦漢之君必當褰裳濡足世說

王羲之初渡浙江便有終焉之志嘗與同志宴集於會稽山陰之蘭亭羲之自爲之序後既去官與東土人士盡山水之遊晉書

王右軍與謝太傅共登冶城謝悠然遠想有高世之志王謂謝曰夏禹勤邦手足胼胝文王旰食日不暇給今四郊多壘宜人人自効而虛談廢務恐非當今所宜謝曰秦任商鞅二世而亡豈清言致患耶世說

王徽之爲桓冲參軍冲曰卿在府日久當相料理徽之直高視以手扳拄頰曰西山朝來致有爽氣耳時聞吳中一士大夫家有好竹欲觀之

便出坐輿造竹下諷嘯良久主人灑掃請坐徽之不顧將出主人乃閉

門徽之便以此賞之盡歡而去嘗寄居空宅中便令種竹或問其故徽之但嘯詠指竹曰何可一日無此君耶嘗居山陰夜雪初霽見色清朗

四望皓然忽憶戴逵逵時在剡便夜乘小船詣之造門不前而友人問之曰本乘興而來興盡而反何必見安道邪過江諸人每至美日輒相

邀新亭藉卉飲宴周侯顛中坐而嘆曰風景不殊舉目有山河之異皆相視流淚唯王丞相導愀然變色曰當共戮力王室克復神州何至作

楚囚相對泣耶世說

孟嘉爲桓温參軍九月九日温游龍山參佐畢集風吹嘉帽墮落初不

自覺嘉門無雜賓嘗會神情獨得便超然命駕徑之龍山顧景酣宴造夕乃歸陶靖節集

淵明嘗往廬山王弘欲識之命其僮僕通之齎酒具於半道栗里間邀之淵明脚疾使一門生二兒舁籃輿既至欣然便共飲酌俄頃弘至亦無迂也嘗九月九日出宅邊菊叢中坐久之滿手把菊忽值弘送酒

至卽便就酌醉而歸

梁蕭統撰陶淵明傳

陸機在洛忽思東頭竹篠之飲語劉寶曰吾鄉思轉深矣

語林

張翰謂同郡顧榮語欲去意榮執其手曰吾亦與子採南山蕨飲三江

水耳翰因見秋風起乃思吳中菰菜葍羹鱸魚膾曰人生貴適志何能

羈宦數千里以要名爵乎遂命駕歸

西晉書

淵明在官八十餘日解印去縣未嘗有所造詣所之唯至田舍及廬山

遊觀而已

陶靖節集

郭文河內軹人年十三每遊山林彌旬忘返父母終服不娶辭家徧遊

名山洛陽陷乃步擔入吳興餘杭大辟山中窮谷無入之地

高士傳

劉麟之嘗採藥至衡山深入忘返見澗水南有二石困一閉一開水深

廣不得過欲還失道遇伐弓者問徑得還或說困中皆仙靈方藥麟之

至更索之不復知處也

高士傳

顧協方數歲外從祖張永嘗携內外孫同遊武丘山撫之曰兒欲何戲

協曰兒政欲枕石漱流永嘆息曰顧氏興於此子

晉書

宋勝之從兄褒爲東平內史遣使召之勝之曰衆人所樂者非勝之願

也乃去遊太原從郇越牧羊以琴書自娛

高士傳

陶弘景性愛山水每經澗谷必坐臥其間吟詠盤桓不能自己謂門人

曰吾見朱門廣廈雖識其華樂而無欲往之心望高巖瞰大澤知此難

立止自恒欲就之又特愛松風庭院皆植松每聞其響欣然爲樂有時

獨游泉石望見以爲仙人

南史

謝靈運好登山陟嶺必造幽峻巖嶂十數重莫不盡登躡嘗著大屐上

山則去前齒下山則去後齒

南史

宗炳每遊山水往輒忘歸入廬山就釋慧遠考尋文義後西陟荆巫南

登衡岳因結宇衡山欲懷尚平之志有疾還江陵嘆曰老疾俱至名山

恐難徧覩惟澄懷觀道臥以遊之凡所遊履皆圖之於室爲之撫琴動

操欲令衆山皆響

南史

劉峻因遊東陽紫巖山築室居焉爲山棲志其文甚美

孔淳之性好山水每有所游必窮其幽峻或旬日忘歸

南史

劉凝之性好山一日携妻子泛江湖隱居衡山之陽登高嶺絕人跡為小屋居之採藥服食高士傳

宗測少靜退不樂人間豫章王疑徵為參軍測荅府云何為謬傷海鳥橫斤山木欲遊名山乃寫其祖所畫尚子平圖於壁上齋莊老二書自隨子孫拜辭悲泣測長嘯不顧遂往廬山止祖舊宅其辭侯子響贈遺曰少有狂疾尋山採藥遠來至此量腹而進松木度形而衣薜蘿淡然已足豈容當此橫施又善畫自圖阮籍遇蘇門於行障上坐臥對之高士傳

徐伯珍宅南九里有高山班固謂之九巖山後漢龍丘萇隱處也山多龍鬚檉栢望之五采世呼為婦人巖伯珍移居之高士傳

沈麟士居貧織簾誦書不輟鄉里號為織簾先生家世孤貧藜藿不給懷書而耕白首無倦挾琴採薪行歌不輟并日而食守操終老高士傳褚伯玉少有隱操寡嗜慾居剡瀑布山性耐寒暑時人比之王仲都在山三十餘年隔絕人物高士傳

庾詵性託夷簡時愛林泉十畝之宅山池居半高士傳

庾承先少沉靜有志操與道士王僧鎮同遊衡嶽又居五臺山寄情丘壑徐則東海剡人嘗嘆曰名者實之賓吾其為賓乎遂懷棲隱之操杖策入縉雲山中又入天台山因絕穀養性五十餘年所資惟松栢水而已高士傳

湘中姚祖大元中為郡吏經衡山望岩下數少年竝執筆作書祖謂行旅休息乃過之未至百步少年相與飛颺遺一紙書在坐處前數句古詩字字皆鳥跡劉敬異苑

梁昭明太子性愛山水嘗泛舟後池番禺侯軌盛稱此中宜奏女樂太子不答詠左思招隱詩云何必絲與竹山水有清音南史

王績嗜酒不任事有奴婢數人種黍春秋釀酒養鳧蒔藥草自供以周易老子莊子置牀頭他書罕讀也游北山東臯著書自號東臯子諱道吾山圓智禪師藥山問何處來曰遊山來藥曰速道將來曰山上鳥兒白如雪澗底遊魚忙不徹傳燈錄

昔高僧隱峰遊五臺山擲杖飛空而往西天傳燈錄

李漬淳澹好古杜門不仕往來中條山中不親產業所居木石幽勝所乘馬嘗為宗人借憇于塵間人有見者以語漬漬即鬻之高士傳

十有二載孟冬之月步自京邑幸於洛師亭鑿廟下清眺僊掌雲拂石牀霓裳可接風過仙嶺仙駕始聞遲迴刻石梗槩名山萬姓瞻予言可復也唐玄宗大華山碑

唐中宗置修文館學士凡天子饗會游豫唯宰相及學士得從春幸黎園則賜細柳圈辟厲夏宴蒲萄園賜朱櫻秋登慈恩浮圖獻菊花酒冬

辛新豐歷白鹿觀上驪山賜浴湯池從行給翔麟馬李適傳

元德秀愛陸渾佳山水乃定居不為垣墻扇鑰歲饑日或不爨嗜酒陶然彈琴以自娛房琯每語人曰見紫芝眉宇使人名利之心都盡唐書本傳

司馬承禎事潘師正傳辟穀道引術後辭去遍游名山廬天台山不出睿宗引問其術曰為道日損損之又損以至於無為夫心目所知見每損之尚不能已况攻異端而增智慮哉帝曰治國若何曰國猶身也故

遊心於淡合氣於漠與物自然而無私焉而天下治帝嗟曰廣成之言也開元中再被召至都玄宗詔于王屋山置壇室以居唐書本傳

王勃客劍南嘗登葛嶺山曠望慨然思諸葛亮之功賦詩見情唐書

道信大師武德中登廬山絕頂望破頭山紫雲如蓋下有白氣橫分六道傳燈錄

比丘無染遊廬山苔滑仆地忽大悟傳燈錄

杜甫少與李白齊名嘗從白及高適過汴州酒酣登吹臺慷慨懷古人莫測也大曆中出瞿塘下江陵沂沅湘以登衡山因客耒陽游獄祠本傳

李白客任城與孔巢父韓準裴政張叔明陶沔居徂徠山日沉飲號竹溪六逸浮遊四方嘗乘月與崔宗之自朶石至金陵著宮錦袍坐舟中旁

若無人晚好黃度牛渚磯至姑熟悅謝家青山欲終焉本傳

太白中峰絕頂有胡僧不知幾百歲眉已長數寸身不製繒帛衣以草葉常持楞嚴經路僻迴絕人跡罕到遇東峰有關虎弱者將死而僧以杖解之西湫有毒龍久而為患而僧以器貯之商山趙叟前年採茯苓

深入太白偶值此僧宿余嘗有獨往之意聞而悅之

岑參詩序

張志和居江湖自稱煙波釣徒築室越州東郭茨以生草椽棟不施斤斧豹席櫻屨每垂釣不設餌志不在魚也陳少游表其居曰玄真坊為

買地大其閤號回軒巷先是門阻流水無梁少游為構之號大夫橋陸

羽嘗問孰為往來曰太虛為室明月為燭與四海諸公共處未嘗少別

又語顏真卿曰願為浮家泛宅往來苒雲間

唐書

呂岩字洞賓會昌中兩舉進士不第去遊廬山遇異人得長生訣多游

湘潭岳鄂之間人莫之識嘗題岳陽樓詩云朝遊北粵暮蒼梧袖有青

蛇膽氣麤三人洛陽人不識朗吟飛過洞庭湖

風土記

摩詰題詩云自大散以往深林密竹磴道盤曲四五十里至黃牛嶺

花川

石丞集

游巖嘗補太學生罷歸入太白山棲蓬山水間自蜀歷荆楚愛夷陵

青溪止廬其側召赴京師行及汝辭疾入箕山居許由祠傍自號曰田

東鄰高宗幸嵩山遣使就問其母又親至其門游巖野服出拜帝謂曰

先生比佳否對曰臣所謂泉石膏肓烟霞痼疾者

唐書本傳

李白遊江淮去之齊魯入吳至長安北抵趙魏燕晉西涉邠岐歷商於

至洛陽遊梁最久復之齊魯南遊淮泗再入吳轉金陵上秋浦尋陽臥

廬山後流夜郎遂泛洞庭上峽江至巫山

唐書本傳

終南山隱者不知何許人也長慶間有嚴士則者採藥終南山誤迷於

巖嶂之間所齎糧糗既盡四遠復無居人忽見茅屋數間遙出松竹之

下煙蘿四合纔通小徑士則連叩其門竟無出者窺籬隙內有一人於

石榻偃臥因推戶直造其前隱者方攝衣起士則拜罷自陳行止因遣

坐于盤石之上亦問京華近事曰天子嗣位幾年吾自安史犯闕居此

也遂於梁棟間啓紙囊其中有百餘顆如扁豆狀取鑑拾薪汲泉煮之

良久甚有香氣視之已如掌大曰可以食矣渴即取鑑中餘水飲之士

則方啗其半已極豐飲乃告以歸路

高士傳

嵩山有神人焦鍊師者不知何許婦人也又云生於齊梁時其年貌可

稱五六十常胎息絕穀居無室廬遊行若飛倏忽萬里世或傳其入東

海登蓬萊竟亦不能測其往也余訪道少室盡登三十六峰聞風有寄
洒翰遙贈云 李太白集

陸羽上元初隱居茗溪自稱桑苧翁闔門著書或獨行野中誦詩不得
意或慟哭而歸 唐書

秦系天寶末避亂剡溪客泉州南安有九日山大松百餘章俗傳東晉
時所植系結廬其上穴石為研註老子彌年不出 唐書曰隱逸傳

唐李約司徒汧公子雅度玄機蕭蕭冲遠有山林之致在湖州嘗得古
鐵一片擊之清越又養一猿名山公嘗以隨逐月夜泛江登金山擊鐵

鼓琴猿必嘯和傾壺達旦不俟外賓 正麓漫抄

韓文公遊華嶽之巔顧視其險絕恐慄度不可下乃發狂慟哭而欲絕
遺書為訣王玄仲欲登蓮花峰約寺僧到峰頂當起煙為信翌日持火

而登僧候之數果有煙起留二旬乃下僧問之云峰頂有池菴菌盛開
可愛其中又有破鐵舟焉 華山記

王休高尚不親勢利常與名僧數人或跨驢或騎牛尋訪山水自謂結

物外之遊 開元遺事

唐潘師正居逍遙谷高宗幸東都召見問所須對曰茂松清泉臣所須
也既不乏矣 唐書

李觀遊南嶽有一人持釘鋏之具問曰聞君遊南嶽奉煩寄語養素先
生藍方云劉處士奉問十月懷胎如何出得觀至南嶽訪方具道其語

方驚曰其人眉間得無有白誌乎曰然方驚曰此劉海蟾也吾養聖胎
已成念非斯人不足以出之吾之不遇命也 列傳

陸龜蒙嗜茶置園顧渚山下歲取租茶自判品第不喜與流俗交雖造
門不見升舟設蓬席齋束書茶竈筆牀釣具往來時謂江湖散人 本傳

王維別墅在輞川地奇勝有華子岡欽湖竹里館柳浪菜萸泚辛夷塢
與裴廸游其中賦詩相酬為樂 正右丞集

韋應物守江州時嘗因觀省屬縣遂至簡寂諸處竝有題詠 正右丞集
宣城王士源者藻思清遠深鑒文理好游名山年十八首事陵山踐止

恒嶽資求通玄丈人又過蘇門問道隱者元知運入太行採藥經王屋

小有洞至太白習隱訣終南脩亢倉子九篇

趙知微有道術中秋積陰不解眾惜良晨知微曰可借酒殺登天柱峰
玩月既出門天色開霽及登峰月色如晝及下山歸則凄風苦雨陰晦
如故 三水小牘

醉吟先生宦遊三十載將老退居洛下所居有池五六畝竹數千竿喬
木數十株臺榭舟船具體而微與嵩山僧如滿為空門友平泉客韋楚
為山水友彭城劉夢得為詩友皇甫朗之為酒友每一相遇欣然忘歸
洛城內外六七十里間凡觀寺丘壑有泉石花竹者靡不遊人家有美
酒鳴琴者靡不過有圖書歌舞者靡不觀 白氏長慶集

魏野居陝州之東郊手植竹樹清泉環遶旁對雲山景趣幽絕鑿土袤
丈曰樂天洞前為草堂彈琴其中好事者多載酒殺從之游嘯詠終日
出則跨白驢 宋史

林逋恬淡好古客游江淮久之歸杭結廬西湖之孤山二十年足不及
城市嘗蓄兩鶴或汎小艇出游客至則童子開籠縱鶴逋隨放棹而歸

高士傳

司馬公居洛嘗同范景仁過韓城抵登封懸峻極下院登高頂入崇福
宮會善寺由轅轅道至龍門遊廣愛奉先諸寺上華巖閣千佛巖尋高
公堂渡潛溪入廣化寺觀唐郭汾陽鐵象涉伊水至香山黃龕憇石樓
臨八節灘過白公影堂凡所經從皆有詩公不喜肩輿山中亦乘馬路
險策杖以行故嵩山題字曰登山有道徐行則不困措足於平穩之地
則不跌其旨遠矣 聞見錄

章子厚與蘇子瞻游南山抵仙游潭之上絕壁萬仞岸甚狹子厚推子
瞻下潭書壁子瞻不敢子厚履險而下以漆墨濡筆大書石壁上曰蘇
軾章惇來子瞻撫子厚背曰子厚必能殺人子厚曰何也子瞻曰能自
判命者必能殺人子厚大笑 合壁事類

予以嘉定十一年仲冬甲戌于歸宗訪墨池鏡溪乙亥自俞峰天宮萬
華重雲上紫霄峰欵杏林覺性丙子至靈谿三將軍洞由隆教過翻經
臺栗里醉石歸去來館濯足靈湯暮抵康王觀丁丑泝澗酌谷簾泉還

山與朱洙陳伯賢段日巖向公莫同來子灞侍釋元澄鑄石宋劉元剛紀遊誌
蘇子瞻初謫黃州布衣芒屨出入阡陌多挾彈擊江水與客為娛樂每
數日必一泛舟江上聽其所往乘輿或入旁郡界經宿不返晚貶嶺外
無一日不遊山

蘇東坡謫黃州時嘗來遊廬山徘徊山南北奇勝多不可紀倦不賦詩
賦其尤作漱玉亭三峽橋二篇廬山記事

春陵周茂叔人品甚高胸中灑落如光風霽月好讀書雅意林壑初不
為人窘束世故茂叔雖仕官三十年而平生之志終在丘壑湓城有水
發源於蓮花峰下潔靚紺寒下合於湓江茂叔濯纓而樂之築屋於其
上黃魯直瀛溪詩序

宋五甲寅夏閏乙未后山翁泳蔡公亮瑤田張復同遊九曲邂逅園田
詹然於大隱屏下相拉觀一字天之勝然之第炤載酒來會引觴命酌
誦朱夫子神虎三章慨然有感援筆賦詩題名而歸公亮書然鑄石武夷志

淳祐二年閏六月二十三日宛陵饒虎臣來遊是日也溪風斂雨山雲

澄靄朝循一曲溯流而上暮宿五曲草廬而歸武夷山志

宋陳知柔在天台奉安輿徧遊名山歸至會稽愛岩壑之秀留止二年
罷賀州歸留惠陽三年暇日泛豐湖登白鶴峰追和東坡詩陶寫羅浮
風物殆盡惠州志

王十朋遷官夔州時待命於廬山徧歷山南北多所題咏

宋陳舜俞嘉禾人由屯田員外謫監南康酒稅常騎牛往來廬山中初
劉凝之嘗為廬山記舜俞因增廣之為五卷又為俯視圖紀尋山先後
次第文獻通考

朱文公每經行處聞有佳山水雖迂途數十里必往遊焉携樽酒一壺
銀杯大幾容半升時引一杯登覽竟日未嘗厭倦又嘗欲以木作華夷
圖刻山水凹凸之勢合木八片為之以雌雄筍相入可以折度一人之
力足以負之每出則以自隨鶴林玉露

石門碕在天池山下有小菴三四是日宿廣福菴來日登山道錦繡谷

再過小橋橋皆有亭下又有亭基二小亭二又盡錦谷登山稍高無復
林木坡陀而上至天池院俱朱文公北紀行

米芾風韻瀟遠趣向高潔山水佳處遊題殆徧本傳

宋周鄴酷愛山水丙午尋訪洞天作磨崖石船記通志

張穀居許之西城有園號小斜川花木泉石隱然一佳處公日在其間
行吟坐嘯至一觴一咏盡歡襟韻翛然君子儒也

竹溪逸民陳洄嘗抵掌于几曰人生百歲能幾旦暮所難遂者適意耳
戴青霞冠披白鹿皮裘所居近大溪篁竹翛翛然生當明月高照水光
潏灩共月爭清輝輒吹短簫乘小舫蕩漾空明月簫聲挾秋氣爲豪直
入無際宛轉若龍鳴深泓絕可聽簫已叩舷歌曰吹玉簫兮弄明月明
月照兮頭成雪頭成雪兮將奈何白漚起兮衝素波人以爲世外人逸
傳

吳萊字立夫好游嘗東出齊魯北抵燕趙每遇中原奇絕處及昔人歌
舞戰鬪之地輒慷慨高歌呼酒自慰頗謂有司馬子長遺風及還江南

復游海州歷蛟門峽過小白華山登盤陀石見曉日初出海波盡紅澄
然長視思欲起安期羨門而與之游由是襟懷益疎朗文章益雄宕有
奇氣嘗謂人曰胸中無三萬卷書眼中無天下奇山川未必能文縱能
亦兒女語耳浦陽人物記

范景仁致仕一朝思鄉里遂徑行入蜀至成都日與鄉鄰樂飲散財於
親舊之貧者遂遊峨眉青城山下巫峽出荆門凡暮歲乃還京師宋名

騎牛者在婺州山中古貌巾褐手執鞭光燦日色扣角而歌曰靜居青
嶂裏高嘯紫煙中世界連仙界瓊田前路通時有僧入山見之揖之不

應馳步趨之不及望青松而去高士傳

開封孫惟信嘗大雪登廬山至絕頂盡得景物之詳嘗撰廬阜紀游一
卷惟信能詩詞有官棄去不仕自號花翁游江淮間人多愛之文獻通

楊璞每乘牛往來郭店自稱東里遺民嘗杖策入高山窮絕處構思爲
歌詩

永嘉陳謙嘉定己巳游山至絕頂得所謂鴈蕩者前人蓋未之識也撰

鴈山行記一卷 文獻通考

謝翱字臯羽福之長溪人個儻有大節會丞相文天祥開府延平長揖軍門署諮事叅軍聲動閩楚間已復別去及宋亡天祥被執以死翱悲不能禁隻影行浙水東逢山川池榭雲嵐草木與所別處及其別適相類則徘徊顧盼失聲哭嚴有子陵臺孤絕千丈時天涼風急翱挾酒登設天祥主荒亭隅再拜跪伏酌畢號而慟者三復再拜起悲思不可遏乃以竹如意擊石作楚歌招之曰魂朝往兮何極莫來歸兮關水黑化為朱鳥兮有味焉食歌闋竹石俱碎聞者爲傷之然其志汗漫超越浩不可禦視世間事無足當其意者獨嗜佳山水如鴈山鼎湖蛟門候濤沃州天姥野霞碧雞四明金華洞天搜奇挾祕所至卽造游錄持以誇人若載七寶歸者游倦輒憇浦陽江源及睦之白雲邨尋隱者方鳳吳思齊晝夜吟詩不自休宋太史集

元黎前交南人居漢陽官湖之上著書種樹環堵蕭然賓客過從無虛日常以遠人自待惟志山水餘不屑意泰定中再遊廬阜紀其所見并

人物藝文爲二卷 紀遊集

王冕買舟下東吳度大江入楚淮歷覽名山川或遇奇才俠客談古豪傑事卽呼酒共飲慷慨悲吟人目爲狂奴北游燕館泰不花家恭薦之曰不滿十年此中狐兔遊矣隱九里山種豆三畝粟倍之樹梅花千桃杏居其半芋一區薤韭各百本引水爲池種魚千餘頭結茅廬三間自題爲梅花屋宋學士集

往者壬戌七月之望予偕葉克仲張廷璧林公輔陳元采夜登巾山絕頂飲酒望月縱談千古竟夕不眠予謂葉君曰昔蘇子瞻夜登黃樓觀王定國諸公登桓山吹笛飲酒乘月而歸以爲太白死三百年無此樂矣斯樂又子瞻死三百年後所無也諸君皆大笑方正學集

孫太初關中人年十八入終南山繼入太白山嚼草木居息大石厓上時有所得赤腳散髮走山最高峯持古松根扣巨奇石以歌久之東入華南浮湘漢登衡祝融峯返嵩山渡汴謁闕里思孔子遺風依依不忍舍去遂上岱宗日觀峯觀夜半日出滄海中發在大叫自以爲奇偉復

南經吳入越探會稽禹穴訪天台石橋返渡楊子江訪殷雲霄東海上
與登孤山瞰海門月餘別去殷雲霄撰太白山人傳

石川子移病歸結屋石川上日取六經讀之自以為樂時獨登岱宗發
狂大叫曰真能小天下不虛也靖江居大江中其東北孤山臨大海石

川子坐孤山東望曰溟滓無他曠然絕世其有乘風凌波來顧我者乎

酌酒海中浩歌而返居青田日多暇則入石門洞瞑目坐數日歸石川子傳

張哲禱雨壺山絕頂謂翠渠周公曰子疇昔愛山每躡屐登高往往有

翹視八荒塵穢下土之意八閩志

余自蘿山抵叔度時雨新霽水循石行注于溪潭遊魚相追逐可玩余

立視久之叔度聞余至出迎余曰美哉水獨有而樂之何不兼也揖坐

亭次聞疾聲砢訇若風雨驟至余駭顧蓋異之乃共飲飲已暮色蒼然

叔度之季叔鄂歌蘇子瞻赤壁賦余亦為之喜叔度曰子瞻死三百年

世豈復有斯人耶於是大笑方正學集

先生與余邂逅鏡潭莊舍已而順舟下青田暮泊少微山下邀予徧游

道院步松林陟峻坡訪鍾呂仙跡尋天然圖畫亭遺趾憇小軒予讀宋

何宗姚掀蓬詩愛賞不已直齊傳

黃哲番禺人性好山水結廬蒲澗棲息其中往來羅浮峽山南華諸名

勝自以為未足乃辭家度庾嶺過吳楚游燕齊間當風雪時泊舟秦淮

遇朱文昭余頴輩相與握手吟咏沽酒大噱廣東通志

宋何胤以會稽山多靈異往游焉居若耶雲門寺後遷秦望山山有飛

泉迺起學舍即林成樓因巖為堵別為小閣室寢處其中躬自啓閉僮

僕無得至者南史

劉歆隱居求志性重興樂尤愛山水登危履險必盡幽遐人莫能及皆

嘆其有濟勝之具南史

劉訐嘗著穀皮巾披衲衣每游山澤輒留連忘返神理閑正在林谷之

間意氣彌遠南史

狄仁傑登太行山反顧見白雲孤飛謂左右曰吾親舍其下唐書

李白登華山落鴈峰曰此山最高呼吸之氣想通帝座恨不携謝眺驚

人詩來搔首問青天耳本傳

仙遊潭中興寺寺東有王女洞洞南有馬融讀書石室過潭而南山石益奇潭上有橋畏其險不敢渡東坡集

是日至下馬磧憇於北山僧舍有閣曰懷賢南直斜谷西臨五丈原諸葛孔明所從出師也東坡詩題

予過池陽登郡樓望九華僅見一峰舟出清溪始見之然猶滅沒於雲霧之間晚泊梅根浦方了了見諸峰也因作九絕王梅溪集

與王郎昆仲及兒子邁遠城觀荷花登峴山亭晚入飛英寺分韻得月明星稀四首東坡

無為子嘗奉使登太山絕頂鷄一鳴見日出又嘗以事過華山重九日飲酒蓮花峰上今乃奉詔與高麗僧統游錢塘皆以王事而從方外之

樂東坡送楊傑詩序

連日與王忠王張全翁游西湖訪北山清順道潛二僧登垂雲亭飲參寥泉東坡集

辯才老師退居龍井不復出入軾往見之常出至風篁嶺左右驚曰遠

公復過虎溪矣辯才笑曰杜子美不云乎與子成二老來往亦風流因作亭嶺上名之曰過溪亦曰二老東坡集

都穆字玄敬清修博學好游山水雖居官曹奉使命有間即臨賞名勝騁其素懷所得必撰一記齋居蕭然或至屢空輒笑曰天地之間當不

今都生餒死國寶新編

鄭善夫字繼之氣秀巖谷發情聲詩古色精言高映霞表飄飄然有逍遙遠舉之志好游名山嘗入武夷馮蕩峻陟冥搜都忘內顧時與衢州方豪同好意泊如矣國寶新編

鐵脚道人嘗愛赤脚走雪中興發則朗誦南華秋水篇嚼梅花滿口和雪嚙之曰吾欲寒香沁入肺腑後去採藥徬岳夜半登祝融峯觀日出仰天大叫曰雲海盪吾心胸心遠堂文章

予泊舟空艸灘上野服登岸眺望由曲徑窈窕入平林度石梁又斗折而西行數百步見峭壁攢峯如屏中有石潭水色幽絕可鑑鬚眉潭上

有石笋駢立勢欲墮有泉出石竇若噴雪花潏潏落潭中傍有磐石如
席石傍有古松三株虬枝奇崛綠陰威蕤予欣然會心小憩石上以觀
泉流俄有一翁曳杖而來癯然山澤之姿似有道者予揖而與之坐歎
語移時因問翁居閒處獨亦觀書乎翁曰壯年服膺九字經今耄矣又
曰人生分定機關計較都不濟事已而蒼然暮色自四山而至予遂與
翁別霞外雜俎序

宋景濂性疎曠每携友生徜徉梅花間轟笑竟日或獨卧長林下看晴
雪墮松頂雲出沒巖扉間悠然以自適嘗與弟子入龍門山著書二十
四篇曰龍門疑道記王惲著宋太史傳

禹案黃帝中經九山東南大柱號曰宛委赤帝左闕之填丞以文王覆
以盤石其書金簡青玉為字編以白銀皆琢其文禹乃東巡登衡人血
白馬以祭禹乃登山仰天而笑忽然而卧夢見繡衣男子自稱玄夷滄
水使者却倚覆釜之山東顧謂禹曰欲得我山神書者齋於黃帝之岳
巖巖之下三月季庚登山發石禹乃登宛委之山發石乃得金簡玉字

知水泉之脉山中又一穴深不見底謂之禹穴

吳越春秋

阮籍字嗣宗志氣宏放傲然獨得或閉戶讀書累月不出或登山臨水
經日忘歸當其得意忽忘形骸

稽康字叔夜常採藥游山澤會其得意忽焉忘反時有樵蕪者遇之咸
謂為神

唐魏萬號王屋山人嘗自嵩歷兗遊梁入吳計程數千里來訪李白不
遇因下江東尋諸名山觀謝公石門後於廣陵與白相見白稱其愛交
好古獨立物表

孫綽字興公博學善屬文少與高陽許詢俱有高尚之志居于會稽游
放山水十有餘年乃作遂初賦以致其意

元結為道州刺史搜攬山水佳處被之詩歌由是此邦山水甲天下本傳

孫統字承公誕任不羈家于會稽性好山水乃求為鄞令轉在吳寧居
職不留心碎務縱意肆游名山勝川靡不窮究

白居易與弟知退及元微之會於夷陵尋幽踐勝知退曰斯景勝絕天

地間有幾乎遂號三游洞 方輿勝覽

樂天由江州司馬除刺史為稍遷故為郡最暇豫有聲迹又其在州東樓以宴賓佐西樓以瞰鳴王溪登龍昌上寺以望江南諸山張樂巴子臺以會竹枝歌女東坡種花東澗種柳皆相傳識其處所

滕王唐高祖之子武德中出為洪州刺史喜山水酷愛蝴蝶尤攻書妙音律暇日乘青雀舸遊江漢甚得其趣自選芳渚基址不大高低得宜遠瞰湘雲近枕漢水仍便以王而名閣焉

有江叟者好吹笛常遇樵叟而鬻鬻遺江鐵笛每於君山龍潭吹之無聲一日携笛登白鶴山吹於紫荆臺響震林谷忽有兩女子出授神藥云服此當為水仙後不知所終女子蓋龍云

何徵君隱吳郡多游臨華寺九經堂飲鹿塘靈寶院涵星澗 高隱外書

簡先生上隱亭望九里山七日不能下但食鵝蒸三千段 琴莊美事

潘勺字叔治登第為吳興都掾絕意祿仕遍游天下佳山水有鴈蕩百味自號癸甲先生 吳中舊事

宋謝臯羽倜儻有大節嘗布衣杖策過姑蘓望夫差之臺慟哭終日過勾踐行禹穴間北向哭乘舟至鄞過蛟門登候濤山感夫子浮桴之嘆則又哭所歷浙東西州佳山水必作有游記有浙東西游錄九卷 謝翱傳

宋方鳳隱仙華山徃徃遇遺民故老於殘山剩水間握手歎歎低回而不忍去 宋遺民志

羅疇字疇老授滁州法椽或曰滁山郡也以公高才處此非宜公曰此歐陽之醉鄉也雖草木禽魚皆能出祥光發妙音庶子紫薇香泉萬斛以為供給瑯琊幽谷白雲千頃以為職田何謂貧僻耶

予昔至九江上石室之崖以瞰青牛蓋天下山川秀接處也 張固白鶴山記

太史公嘗登姑蘓臺以望五湖

徐武功平生好奇每遇游覽必窮其勝林屋洞天在包山其中深窈幽黑久無游者武功列炬而入行頗久至一處平敞寬崇特為幽妙四壁上下皆作金色有石乳自上滴下相接至地瑩如白玉謂之曰金庭王柱者是也中設石林類為仙者之外室再欲進步則有流水阻絕漸為

深杳不能前矣題曰隔凡字勢飛逸疑非人間書也蕪談

廬山有三石梁長數尺廣不盈尺杳然無底吳猛與弟子躡石梁而度見金闕王房地皆五色見一老翁坐桂樹下以玉杯承露與猛潯陽記

攝泉居士許彥明雅好山水金陵名勝無不至樂與禪宿游清齋玄論坐以終日嘗因事南游三茅虎丘以躡武林汎西湖北渡淮涉沛歷齊

魯至燕覽西山諸陵之槩賦奇弔古往往寄懷其間晚乃買田東海上期扁舟往來效張志和陸魯望之樂顧麟著許彥明誌

錢塘楊祐年十九領鄉貢入京師道鄒魯之虛過稷下周游渤海之間登郭隗之臺慷慨悲懷有統攝千古之意許應元著誌

宋蕭思話嘗從文帝登鍾山北嶺中道有盤石清泉使於石上彈琴因賜以銀鍾酒曰相賞有松石間意

謝靈運與族弟惠連東海何長瑜穎川荀雍泰山羊璿之以文章賞會共為山澤之游時人謂之四文

又中子游馬頰之谷遂至牛首之溪龔氏本云子游黃頰之谷遂至白

牛之溪注云王績嘗題詩黃頰山壁王無功又曰吾往見薛收白牛

溪賦韻趣高奇詞義曠遠嗟峨蕭瑟真不可言壯哉邈乎楊班之儔也高人姚義嘗謂吾曰薛生此文不可多得登太行俯滄溟高深極

矣子游汾亭坐鼓琴有舟而釣者過曰美哉琴意傷而和怨而靜在山澤

而有廊廟之志非太公之都磻溪則仲尼之宅泗濱也子遊馬頰之谷遂至牛首之谿登降信宿從者樂姚義竇威進曰夫子

遂得潛乎子曰潛雖伏矣亦孔之昭子遊河間之渚河上丈人曰何居乎斯人也心若醉六經目若營四海

何居乎斯人也文中子去之薛收曰何人也子曰隱者也收曰盍從之乎子曰吾與彼不相從久矣俱文中子

北魏李謐不飲酒好音律愛樂山水高尚之情長而彌固一遇其賞悠爾忘歸

唐崔咸素有高世志造詣漸遠間游終南山乘月吟嘯至感慨泣下

孟郊少隱嵩山性介少諧合後爲溧陽尉縣有投金瀨平陵城林薄蒙
翳下有積水郊間往坐水旁徘徊賦詩

天華宮在羅浮山之西蘇軾曰南漢主建有甘露羽蓋等亭雲華閣命
中書舍人鍾有章作記初南漢主夢神人宿羅浮山之西去延祥寺
西北有兩峰相疊一洞對流可以爲宮訪之得其地又夢金龍起於
宮所遂改爲黃龍洞此地即葛僊西菴至宋朝革命四方僭叛以次
誅服劉氏懼焉將欲潛遁羅浮爲狡兔之穴又命於增江水口鑿濠
通山往來山峒倉卒爲航舟之計開寶四年乃始歸命則知劉氏爲
寶宮於山間無事則爲臨賞之樂有事則爲逋逃之所其計窘矣惠

錄

錫杖泉在羅浮寶積寺即景泰禪卓錫之地亦謂之卓錫泉蘇軾曰
余昔自汴入淮泛江泝溪歸蜀飲江淮水蓋彌年既覺至井水腥澁
百餘日然後安之以此知江之其於井也予來嶺外自楊子江始飲
江水及至南康江益清駛水益甘則知南江賢於北江也近度嶺入

清遠峽水色如碧玉味亦益勝今日游羅浮酌景泰禪師錫杖泉則
清遠水又在下矣嶺外惟惠人喜鬪茶此水不虛出也同前

白水山在象頭南蘇軾曰羅浮之東麓也有懸泉百仞山八九折折
處輒爲潭深者縷石四五丈不能及旁有巨人跡數十謂之佛跡巖
巖西故有院亦曰佛跡同前

宋嘉熙二年十二月陸務觀與何德器張仲玉韓無咎游焦山題名云
踏雪觀瘞鶴銘置酒上方烽火未息望風檣戰艦在煙靄間慨然盡
醉薄晚泛舟自甘露寺以歸

紹興五年乙卯夏石林葉少蘊避暑于山中每旦起命一僕夫負榻擇
泉石清曠松竹幽茂處偃仰終日賓友罕至又自云家藏書數萬卷
歲出曝之閱兩旬始畢每盛夏避暑時命門生輩讀而聽之不覺至
晏

汪藻斥居永州積十二年間遇勝日幅巾葛屨登西山循鈎鋤潭入愚
溪並湘流沉文以弔古人而自肆於山水與柳儀曹相望於數百載

後

向子文隱于衡之伊山乃晉桓伊書堂故基結茅爲堂置書其中茂竹
幽蘭蔭翳前後春葩秋馥以時自獻猿啼近嶂鷗馴曲沼馬屎車喧
杳然于雲水之外胡寅韓璜自天柱峯南襍被枝筇歲一再往焉或
商較文義或把觥賦詩逍遙襄羊興盡而後別 胡寅有裕堂記

浦江吳萊嘗應貢舉東經齊魯梁楚之郊北抵燕趙每遇中原奇絕處
輒瞪然長視平岡灌莽一望千里昔人歌舞爭戰之地皆前迎後却
畢在塵沙霜露中遂與當塗李翼餘姚方九思臨川傅斯正貫酒高
歌天寒風急毛髮上豎自謂綽有司馬子長遺風尋歸田里出游海
東洲歷蛟門峽過小白華山登盤陀石見曉日初出海波盡紅瞪然
長視思欲起安期羨門而與之遊著觀日賦以見志由是襟懷疎朗
文章益雄宕有奇氣嘗謂人曰胷中無三萬卷書眼中無天下奇山
川水必能文縱能亦兒女語耳還寓同縣陳士貞家士貞之居與龍
秋五洩鄰榛篁蒙幕似不類人世先生日歎詠其中暢然自得或至

暮忘返

宋濂著

徐有貞晚年遊浪山水縱情幽賞携妓樂歌嘯傲睨風態超逸輝照巖
谷宛然古高賢復出嘗遊林屋洞天有中昇之想焉性喜夜燒燈與
客語徹旦無倦狀或孤步遐逝若有遇奇流至人下視汗濁糠粃如
免耳



